

Mukwenzi Weyala Lemeshaku Nzambi naMujimba Weyi

Muwukwenzi weyi wukumona kutesha kwasweja kutoha muchihandilu cheyi mukufwila kweneni kwakudimona namumbanda. Hela neyi hadaha chinleji chamuchima weyi chikukuleja nindi chatama kudimona namumbanda mwenimu henohu kanda wiñili muwulu, wukukabakana hefuku hefuku nakufwila kwokumu kwakukama namumbanda.

Dichi muloŋa wawusoku iwu wunamwekani neyi walema nankashi, twatela kwiluka netu muntwinyi wawulenjeli, dichi nawa wawulenjeli muloŋadi. Mukanda wajila waNzambi hichimwekeshu chikupu chaNzambi kudetu, dichi wunatwakuli mwalumbuluka hansaŋu iyi:

- a) Nzambi diyi Nleŋi yaweyala nimumbanda. Yena nawukalawenu wawumbili mujimba weyala niwamumbanda, Kutachika 2:7, 22.
- b) Hohenohu Nzambi wenkeli mumbanda kudi iyala ekali chamukunkulu chasweja kulema, nakuyinunja hamu muwulu, Kutachika 2:22, 24.
- c) Wusoku wakudimona namumbanda hichibalu chalema chawulu, 1 AKorinda 7:3,4.
- d) Muloŋa wawusoku wakudimona namumbanda wunafumi kudi Nzambi, wudi walubanji niwajila, Yishimu 5:18,19; AHeberu 13:4. Iyala namumbanda adinji nzekesi kumesu awumu namukwawu, ilaŋa hiyatiyili nsonyuku, Kutachika 2:25.
- e) Wusoku wakudimona namumbanda watela kubadika wusoku wakununja nyijimba yenu hamu hohu. Mwalala muwusoku wakudimona neŋodeyi wukukolesha kukeŋa kweyi kwasweja kutoha hadi yena, nakumumwekeshela neyi wunadihani kudi yena chiwekala mwejima nakumwinka yuma yeyi yejima. Chinakoleshi nawa muchima weyi nikudihana kweyi kwakudinunja mwejima nindi bayi wachenjuku hanyaka yeyi yejima.

Dichi chinalumbuluki hatooka netu Nzambi walenjeli wusoku wakudimona namumbanda wumwekani muwulu hohu. Ilaŋa Satana (chilumbu chaNzambi) wukweti kufwila kwachenji. Mwanta Yesu watanjishili nindi Satana hintwambi nimbanji, Yowanu 8:44. Dichi neyi Nzambi nakuleji nindi kutiya kuwaha mwakudimona namumbanda chiŋa muwulu hohu, Satana wukukuteshaŋa nindi kudimona nakala mumbanda wunakenji. Anukaku neyi, kufwila kumu hohu kwaSatana hikukukisaŋana muwumi iwu wahanu heseki dichi hayanyaka nanyaka mwijiya dakesi.

Yuma yinasoŋi kukutwamba kwaSatana yinamwekani nankashi munyichidi yayivulu yanyisoŋu yinafumi kunshidi yawujila, sweje-e musoŋu waHIV/AIDS. Neyi antu analondi kuleŋa nikuleja kwaNzambi hawusoku wakudimona namumbanda, mutenowu nyisoŋu yeniyi yejima hiyinamwekanuku. Kulondela muchima waNzambi muchihandilu cheyi hinjila yasweja kuwaha yakudikiŋa kunyisoŋu yeniyi yejima. Dichi nawa wukudikiŋa kukukata kweneni nikukala kwakuvulu kwenzaŋa muyihandilu yawantu hamuloŋa wanyisoŋu yeniyi.

Chiŋa wutorojoki namaana nankashi hakudimona namumbanda henohu kanda wiñili muwulu. Neyi mumbanda wumu neteji akami naneyi, nankashi chinalumbuluki netu yena mumbanda nakami dehi nawamayala amakwawu, dichi watela kwikala namusoŋu wafumaŋa kuwujila hela musoŋu waHIV/AIDS. Bayi wudidimbaku mwakukonjesha ma“condom”, muloŋa ma“condom” anatweshi kukaŋanya kukukiŋa kunyisoŋu yayivulu, nankashi kumusoŋu waHIV/AIDS. Anukaku neyi kudimona kamu hohu namumbanda henohu kanda wiñili muwulu chinatweshiki kukukisaŋana hanyaka yeyi yejima yahanu heseki! Kukata ninyisoŋu yikufuma kukukoŋa iku kumu hohu hiwakatweshi kuyibalumunaku.

Amayala amavulu anatorojoki nawu chiŋa adimonaŋa namumbanda henohu kanda enjili muwulu eluki nawu anatweshi kuvwala anyana. Hikutwamba kukwawu kwaSatana. Muloŋa kudimona namumbanda henohu kanda wiñili muwulu hadaha wukutambula musoŋu wumu wakakukonjesha kuvwala anyana hanyaka yeyi yejima! Anukaku neyi, Nzambi diyi wenkaŋa anyana, Masamu 127:3, hiyafumaŋa kuŋovu jeyuku.

Hadaha wukwihula lwihi lwasweja kulema neyi, chikutweshika ŋahi mukwenzi weyala adijiliki henohu kanda enjili muwulu? Dimu hichuma chasweja kukala nankashi, dichi kwilamu muŋovu jeyi wukukaŋanya. Chiŋa nakukwasha kwaNzambi hohu wukwimika mushindu munjita yeniyi yasweja kutoha. Anatuleji muAEfwesesa 6:10-13 nawu chiŋa twikali akwaŋovu mudi Mwanta kulonda twimani mwifuku datama. Nzambi nakeŋa kukwasha mujinjila jeniji:

1. Chiŋa wuwwaliki muchisaka chaNzambi dichi kutambula kudi yena chisemwa chachiha. Eyi wawwalikili mukayi iku nachisemwa chanshidi. Chinakwilishi ndunju yanshidi, dichi wudunju iwu wamwekanaŋa

muchihandilu cheyi. Anatuleji muARoma 8:7,8 nawu yitorojoka yacheseemwa yadikaŋaŋa naNzambi hiyamutyishaŋa Nzambi kuwahaku. Chiwukwiluka neyi chihandilu cheyi chanshidi chidi nakukulombola kukusompesha kwaNzambi kwahayanyaka, wukufwila nankashi kuchishiya. Ilaŋa wudi nduŋu dichi wunabuli ŋovu yakudibalumuna. Henahana kushinshika kukala kweyi kwejima wukubilela kudi Nzambi akutyili luwi nakukwamwina, Matewu 14:30.

Chiwukulomba Mwanta Yesu akwamwini nikwikala Mwanta wachihandilu cheyi, wukumona kuvwalika chachiha, 2 AKorinda 5:17; Yowanu 5:24. Nzambi wukukwinka chisemwa chachiha, dichi nawa wanta nimuchima wakumutyishaŋa kuwaha, 1 Yowanu 3:9; 2 AKorinda 5:9.

2. Kwiluka nakashinshi neyi Nzambi nakeŋi nindi wudijiliki henohu kanda wiŋili muwulu, 1 ATesalonika 4:3-7; ARoma 12:1, 2. Dichi wukudihana nankashi wowwahili kuleja iku kwalema.

3. Kwiluka nakashinshi neyi muloŋa wudi mukwaKristu, mujimba weyi hiweyeyi wakukoŋesha mwaya muchima weyuku, wambala waNzambi, 1 AKorinda 6:18-20.

4. Kulomba kudi Nzambi hefuku hefuku akukiŋi nakukuhemba mukujila kweyi. Masamu 16:1.

5. Kusweka mazu aNzambi mumuchima weyi, chikukuhemba kukutesha kwakudimona namumbanda, Masamu 119:9-11.

6. Kufuma kukuvwalika kweyi kwahanu heseki, Nzambi nakwinki kujila kweyi kulonda wuchihembi chikali iheta deyi dasweja kulema dakumwinka mukwetala deyi. Hiwukwikala namuchima wakumwinka wachenji iheta deniduku. Kudinka kudi iŋodeyi chakakolesha nankashi neyi wunakenji yena kubadika ambanda ejima.

7. Kukolesha wubwambu nawanyikwezi amayala awa anakenji kuhemba kujila kwawu nawa, 1 AKorinda 15:33.

8. Bayi wikalaŋa namumbanda kanka wenu mpinji yayilehuku.

9. Kubula kuyaŋa kumaluŋa kwekalaŋa kutesha kwakudimona namumbanda, dichi nikubabala hayuma yiwukutaŋa nikutala.

Neyi kunyima wakaŋenyi kwiluka nakashinshi kulema kwakujila kweyi, chachiwahi nankashi kutachika mwamwiha lelu. Chiwukubilela kudi Nzambi akwamwini, yena wukutookesha nshidi jeyi jejima jakunyima, Isaya 1:18; AHeberu 10:17.

Neyi wudi mukwaKristu, kudijilika henohu kanda wiŋili muwulu hinjila yasweja kulema yakumwekesha neyi kukuhwelela kweyi mudi Nzambi kwakweni, Kutachika 39:7-9. Chikuleta nawa nkisu muchihandilu cheyi chahanu heseki nachihandilu chakamwekana mwiwulu, 1 Timotewu 4:8. Neyi wukumulemesha Nzambi mumujimba weyi henohu kanda wiŋili muwulu, yena wakakwinka wusoku wasweja kuwaha naŋodeyi chiwakenjila muwulu.

Ilaŋa anukaku neyi wujila hiwukuleta kukata ninyisoŋu nikukala mwamuvulu hohuku, nankashi wukuleta kusompesha kwaNzambi muchihandilu cheyi, AHeberu 13:4. Nzambi nahoshi nindi akwawujila hiyakaswana wanta waNzambuku, 1 AKorinda 6:9.

Eyi wukwiladi nakujila kweyi? Kulondela walala waNzambi tahindi kutwamba kwaSatana? Hikutonda kweyeyi, ilaŋa watela kwiluka neyi chikukuletela nkisu jaNzambi hela kusompesha kwaNzambi muchihandilu cheyi. Bayi mudidimbaku, Nzambi hiyamusehaŋaku. Yonsu yakudimayi muntu diyi yakaŋulayi, ADalija 6:7.